



Brouard afera ahozko epaiketarako prest dagoela erabaki du epaileak

Montero salaketa pribatuko abokatua ez dago ados sumarioa ixtearekin

Zazpi urte eta gero, epaileak amaitutzat eman du Santi Brouard HBko buruzagiaren hilketan frogak bilatzeko prozesua eta sumarioa ahozko epaiketa egiteko prest dagoela erabaki du. Txema Montero salaketa pribatuko abokatua, ez dago ados erabakiarekin, oraindik errekurrituko duen ez badaki ere.

Z. ZAMAKOLA / BILBO

Maria Isabel Durantez Gilek, Bilboko 1 Instrukzio Epaitegiko arduradunak, atzo eman zuen sumarioa ixteko agindua. 1984eko azaroaren 20an bi gizonen Santiago Brouard tirokatu Bilboko kontsultan eta hil zutenetik, zazpi urte eman dira afera honetan frogak biltzen.

Halere, une honetan bi prozesatu baino ez dago sumarioan: Rafael Sanchez Ocaña ustezko hiltzaile gisa eta Juan Jose Rodríguez Díaz, 'El Frances' derrigorrezko kolaboratzaile gisa, ustez atentatuan erabili ziren armak saldu zituelako.


Luis Morcillo Pinillo enpresaria aurkitu eta atxilotzeko agindua emanda badago ere, hilketaren eragilea eta partaideetako bat izan daitekeena prozesatzeko agindurik ez dago.

ETSIPEN JUDIZIALAREN SUSMOA Txema Monterok, Brouarden familiaren izenean salaketa pribatuaz arduratzen den abokatuak, sumarioa ixtearekin ez zegoelako ados esan zuen atzo, baina ez zuen azaldu errekurritzeko erabakirik.


«Ez nago ados erabakiaren idazkerarekin, ez dituelako aipatzen armak eta bestelako elementu objektiboak, eta deklarazioez bakarrik ari delako», esan zuen.

Monterok onartu zuen epaileak egia diola «egia osoa argitzea ezinezkoa» dela esatean, baina halere erantsi zuen ez duela onartzen «argitu den egia zatiak: bi prozesatu dagoela legehauste oso larriengatik eta gainera ez du argitzen Luis Morcillo Pinilloekin zer gertatzen den», beraren hitzetan. Abokatuaren ustez, errebeldian ere epaitu ahal da enpresari hau.

SUMARIOAREN EMAITZA ESKASAK Salaketako abokatuak hamar eguneko epea dauka erabakia errekurritzea nahi duen pentsatu aurretik. «Une honetan sumarioa begiratu behar dut, zenbait frogak dagoelako eskatuta eta egin gabe. Jakin nahi dut epaileak ez dituen beharrezko ikusten ala etsipen judiziala dagoen», argitu zuen.



Rodríguez Díaz, El Frances, eta Lopez Ocaña, kasuan akusatutako bi.



SIVALL / EFE

Sumarioa zazpi urtez irekita egon den arren eta 4.000 foliotik gora biltzen dituen arren, gutxi dira lortu dituen emaitzak: bi prozesatu (Rafael Lopez Ocaña eta Juan Jose Rodríguez Díaz, 'El Frances') eta zalantza ugari.

Gainera, Luis Morcillo Pinillo aurkitu eta atxilotzeko nazioarteko agindua emanda dago, ustez hilketan parte hartu zuelako, zuzenean izan gabe ere. Afera guztiaren korapiloa aska dezakeen elementua, halere, ez dago prozesatua, eta deklaratu dezan biltzen dute.

Poliziaren eta administrazioaren utzikeria da afera honetan izan den ohizko puntu nagusietakoa. Gaur egungo sumarioaren funts guztia ia kasualitatez etorri da: 1985eko abuztuan Miguel Angel Lopez Ocaña bere koinatua, Daniel Fernandez Aceña, hil zuen.

Poliziak 'ohizko' hilketat hartu zuen, Miguel Angel eta Maria Luisa

Sanchezen bere emaztea atxilotu zuten. Lopez Ocaña, orduan, epaileari esan zion emaztea askatuz gero Santi Brouarden hilketat zekien guztia azalduko ziola.

Horrela kontatu zuen bere koinatua dirua eskaini ziola «ETAko mediku bat» hiltzeko. Halere, berak ez zuen onartu eskaintza eta Cespedez bakarrik joan zen. Armak, berriz, Rodríguez Díaz 'El Francesi' erosi zizkiola gaineratu zuen.

RAFAEL ATXILOKETA USTEKABEKOA Ondorengo ikerketa batzuetan jakin zen Miguel Angel Lopez Ocaña eta emaztea, Rafael Lopez Ocañarekin eta Jean Louis Peralesekin atxilotu zutela Calatayuden, kilo bat heroina zutela. Halere, fidantza ordaindu eta berehala behin-behineko askatasuna eman zieten.

Begoña Martinez Murgia, Brouarden erizainak Rafael Lopez

Ocaña identifikatu zuen, zalantzarik gabe, Santi Brouard hil zuten bi pertsonetako bat bezala.

Rafael Sanchez Ocaña aurkitu eta atxilotzeko agindua eman ostean, honek nortasun agiri nazionala ere aldatzeko aukera izan zuen atxilotu barik, eta ustekabea behar izan zen kasu honetan ere atxilotzeko: 1989an emaztea jipoitu eta honek salaketa ipini zion; El Escorialeko epaitegian zegoela, funtzionari batek ezagutu egin zuen.

Irurtzun-Andoain autobidea

Autobideko lanak geldieraztea nahitaezko baldintza HBrentzat

DONOSTIA

Irurtzun-Andoain autobideko lanak geldieraztea «nahitaezko baldintza da elkarriketari jarraipena eman ahal izateko», Jose Maria Olarra Herri Batasunako mahai nazionalako kideak atzo adierazi zuenez. Olarraren ustez, herriaren nahiak erreferenduma edota adostutako beste irtenbideren bat eskatzen du, baina hori ez da posible izango «inposaketari» eusten zaion bitartean.

HBkoaren esanetan, lanak gelditzeko eskaera «demokratikoa» da eta hori ukatzea berriz «gipuzkoarren gehiengo iraintzea izango litzateke, duela hiru hilabete hasitako bideak konponbidea ekar dezakeela uste bait du gehingo horrek».

Gipuzkoako Batzar Nagusiek datorren astelehenean egingo duten plenoan «gizartea eta erakunde artetako zatiketa nabarmenduko da», Olarraren esanetan. HBkoaren irudi-

Preso baten lagunari hura ikustea debekatu diote baimena eduki arren

BILBO

Bilboko Espetxe Zaindaritzako epaileak ez duela legediak dioena betetzen salatu zuten atzo Amnistia-aren Aldeko Batzordeek, Oskar Abad presoaren lagunari hura ikusteko baimenik ez diotelako eman, horretarako eskubidea bazuen ere.

Oskar Abaden laguna joan den astelehenean, hilak 4, Basurtuko ospitalera hurbildu zen hura ikusteko asmoz. Presoa zaintzen duten poliziek ordea ez zioten sartzen utzi, lagunak legeak agintzen duen agiria —Abadekin bizi zela frogatzen zuena alegia— erakutsi zien arren. Poliziak esan ziotenez, Espetxe Zaindaritzako epailearen baimena lortu arte ez zioten Abad ikusten utziko.

Baionan atxilotuta geratzen ziren bi abertzaleak aske

BAIONA

Jean Gabriel Lasserre eta Dominique Ortuno kalera atera ziren atzo goizeko zortziak inguruan Baionako Polizia etxetik, hogeitalau ordu atxilotuta pasa ondoren Pariseko epaile batek egindako galdeketa agindu baten ondorioz. Bi abertzale lagun hauekin batera astearte goizean harriatu zuten Jean Luc Auziart aske utzi zuten herenegun arratsaldean berean. Ipar Euskal herriko preso politikoaren sustengua elkarteko kide diren hiru lagun hauek kargurik gabe utzi zituzten libre.

Atxilotuta hauek lotuak ziren joan zen abuztuaren 11n, Miarritzen, Sud Immobilier promotore bulego baten aurka gertatu zen atentatu saio baten ondotik irekitako auzibidearekin.

Zazpi urte, hamalau epaile

Zortzi epaile titular eta behin behineko beste sei epailek hartu dute parte 'Brouard' aferaren froga biltzetan, azken zazpi urteetan; hau da, bi epaile urteko.

Txema Montero salaketa pribatuko abokatuak behin eta berriro epaile berezi bat izendatzea eskatu duen arren, beti bota diote atzera eskakizuna. Montero sarritan kexu agertu da, askoz ere garrantzi gutxiagoko aferekin (hala nola Juan Guerraren kasuak), epaile berezia merezi izan dutelako.

Hilketa izan zen egunean, Bilbora lau hilabete lehenago heldu zen Arturo Gonzalez zegoen goardian. Miguel Sanchez Ocañaren adierazpenak agertu zirenean, oraindik Bilboko Epaitegian zegoen eta bera arduratu zen Ocañari eta 'El Francesi' galdeketa egiten.

1986ko apirilean Elisabeth Huertak hartu zuen ardura, eta uda igarota, urriaren hiruan, Eduardo Herrero Casanovak izendatu zuten Instrukzioko 1. epaitegiko buru.

1987ko maiatzean Julio Garcia Bragak hartu zuen txanda, urte bete. Elisabeth Huertak berriz ere behin behineko ardura hartu ondoren, Manuela Francisca Fernandez etorri zen Bilbora, ekainaren 15ean. 1989an Inmaculada Jurado etorri zen eta azkenik, joan den abenduan, gaur egun kasuaz eta Bilboko Epaitegiko Instrukzioko 1. Epaitegiaren Isabel Durantez Gil epailea arduratzen da.